

# Powšitkowne WOZJEWJENJA

njedźelu, 16. apryla 2017

## W lětnich prózdninach do Sakskeje Šwicy

Dekanatne dušepastyrstwo přeprašuje šulerki a šulerjow wot 6. do 8. lětnika wot 17. do 20. julija na zhromadne dny w Rosenthalu-Bielatalu. Nadrobniše informacije nańdžeće na wupowěsnjenych plakatach w serbskich wosadach kaž tež pod [www.posol.de](http://www.posol.de).

## Emmauske pućowanje lětsa w Sulšecach

Wšitcy serbscy młodostni su tež lětsa na Emmauske pućowanje přeprašeni – a to jutrowny štwórtk, 20. apryla, do Sulšec. Pućowanje zahaji so we 18 hodž. we wjesnej kapalce.

## Jutrowne překwapjenki w klóšterskej zahrodźe

Na dyrdomdejske popołdno su dorosćeni a džěci jutrownu srjedu, 19. apryla, do klóšterskeje zahrody w Pančicach-Kukowje přeprašeni. Wot 13 do 17 hodž. móža na přikład wowčerja z jutrownymi jehnatami dožiwić, zajimawosće k temje „jejko“ zhonić, kreatiwni być abo wot rjadnicow spřihotowane stacije wopytać. Štóž ma lóšt, móže tež z fyzioterapeutku specielne nalětnje fitnessowe poskitki wužiwać.

## Beneficny nyšpor w Chróśćicach

Na dobro dawno trěbneje techniskeje reparatury našich pišćelow wuhotujemy njedźelu po jutrach, 23. apryla, w 14 hodž. w našej farskej cyrkwi w Chróśćicach beneficny nyšpor. Pišćelotwarska firma Eule w Budyšinje je nětk rozrisanje wuwila, z kotrymž móže so defekt wuspěšnje wotstronić. Kóšty pak móžnosće wosady přesahuja. Prosimy tohodla šěroku zjawnosć wo pomoc. Jako wosada wuhotujemy mlodojutrowny nyšpor z dujerjemi, spěwarjemi a dalšimi instrumentalistami. Wjeselimy so na bohaty wopyt a nadźijamy so šćedriwych darow w zběrce. Štóž chce swój dar njehladajo na to přepokazać, njech wužije wosadne konto Pfarrei HI Ap Simon und Juda, IBAN: DE1475 090 30 000 0829 8998 a poda hesło „Orgel“. Štóž trjeba darowansku kwitowanku, njech poda swoje předmjeno a mjeno kaž tež swoju adresu.

*Farar Měrćin Deleńk*

## Hłowna zhromadźizna Towarstwa Cyrila a Metoda

Předsydstwo Towarstwa Cyrila a Metoda z.t. (TCM) přeprašuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu wólbnu zhromadźiznu pónđzelu, 24. apryla, do Kulowa. Započnjemy we 18.00 hodž. z Božej mšu w cyrkwi, kotruž wuhotuje chór Bratrowstwa. Přizamknje so zhromadźizna na Bosćanowej žurli. Dnjowy porjad je w Katolskim Posole wozjewjeny.

*Jurij Špitank, předsyda TCM*